

**Ўзбекистон Республикаси Президенти Ш.М.Мирзиёев раҳбарлигида
2021 йил 22 апрель куни кенгайтирилган тарзда ўтказилган
видеоселектор йиғилишининг
21-сонли Б А Ё Н И1111**

**Раислик қилувчи: Ш.М. Мирзиёев – Ўзбекистон Республикаси
Президенти**

Қатнашганлар: Ўзбекистон Республикаси Олий Мажлиси Сенати Раиси, Қонунчилик палатаси Спикери, Ўзбекистон Республикаси Бош вазири, Ўзбекистон Республикаси Президенти Администрацияси раҳбари, Ўзбекистон Республикаси Президенти маслаҳатчиси ва маслаҳатчи ўринбосарлари, Бош вазир ўринбосарлари, Давлат хавфсизлик хизмати раиси, Бош прокурор, Ҳисоб палатаси раисининг биринчи ўринбосари, Қорақалпоғистон Республикаси Жўқорғи Кенгеси ва Вазирлар Кенгаши Раислари, Тошкент шаҳри, вилоятлар, туманлар ва шаҳарлар ҳокимлари, марказий муассасалар, вазирликлар, идоралар, хўжалик бирлашмалари ва тижорат банклари раҳбарлари *(рўйхат бўйича)*

КУН ТАРТИБИ:

**Худудларда хизмат кўрсатиш соҳаси йўналишларини ривожлантириш
бўйича устувор вазифалар тўғрисида**

(Мирзиёев, Қўчқоров, Юсупов, Хидоятлов, Мирсоатов, Хидоятлов, Бобоев, Салиев,
Ғаниев, Арипов, Қудбиев, Закиров, Ўбайдуллаев, Мусаев, Шерматов,
Зарипов, Сариев, Камалов, Мирзиёев)

Қайд этилсинки, пандемиянинг салбий таъсирини юмшатиш мақсадида, хизматлар кўрсатиш ва сервис соҳасидаги тадбиркорларни қўллаб-қувватлаш учун 24 турдаги солиқ имтиёзлари, субсидия ва бошқа преференциялар тақдим этиш орқали 35 трлн сўмлик кўмак берилди.

Оилавий тадбиркорликни ривожлантириш дастурлари доирасида хизмат кўрсатиш соҳасига 1 трлн сўм имтиёзли кредит ресурслари ажратилди. Бундан ташқари, тижорат банкларининг ўз маблағлари ҳисобидан ушбу соҳада фаолият юритаётган тадбиркорларга қўшимча 14 трлн сўм кредитлар берилди.

Натижада, жорий йилнинг биринчи чорагида хизматлар кўрсатиш ҳажми 61 трлн сўмни ташкил этиб, ўтган йилнинг мос даврига нисбатан 5,8 фоизга ўсди. Шунингдек, сервис соҳаларида ўзини ўзи банд қилган қарийб 500 минг нафар фуқаро расмий рўйхатдан ўтди.

Шу билан бирга, аниқ методология яратилмагани, шунингдек жойларда сектор раҳбарларининг эътиборсизлиги оқибатида, кўрсатилаётган хизматлар ҳажми, объектлар сонини аниқлаш ва худудлар салоҳиятини тўғри баҳолашнинг имкони бўлмапти.

Худудларнинг ўзига хос хусусиятлари ва имкониятларидан келиб чиқиб, хизматлар соҳасини ривожлантириш, жойларда янги хизмат турларини йўлга қўйиш, илғор тажриба асосида ушбу соҳада амалга ошириладиган намунавий лойиҳаларни жорий этиш, тармоқлар раҳбарлари, ҳокимлар ва секторлар раҳбарларининг масъулиятини ошириш мақсадида йиғилиш **қарор қилади:**

Қорақалпоғистон Республикаси Вазирлар Кенгаши Раиси, вилоятлар ва Тошкент шаҳар ҳокимлари томонидан тегишли туман ва шаҳарларда хизматлар соҳасини ривожлантириш бўйича етарли чоралар кўрмагани учун 28 нафар мутасадди раҳбарлар лавозимидан озод қилингани, шунингдек 54 нафар раҳбарга нисбатан “ҳайфсан” интизомий жазо чораси қўлланилгани маълумот учун қабул қилинсин.

Транспорт вазирлиги (**Махкамов**), Ахборот технологиялари ва коммуникацияларини ривожлантириш вазирлиги (**Садиков**), Халқ таълими вазирлиги (**Шерматов**), Олий ва ўрта махсус таълим вазирлиги (**Тошқулов**), Соғлиқни сақлаш вазирлиги (**Хаджибаев**), Қурилиш вазирлиги (**Закиров**), Маданият вазирлиги (**Назарбеков**), Қишлоқ хўжалиги вазирлиги (**Ходжаев**), Бандлик ва меҳнат муносабатлари вазирлиги (**Хусанов**) **ўн кун муддатда** ўзи масъул бўлган йўналишларда замонавий бозор хизматларини ривожлантириш ва соҳага хусусий секторни кенг жалб этиш бўйича 2021 йил учун вазифалари тўғрисидаги кафолат хатини Ўзбекистон Республикаси Президенти Администрациясига киритсин.

Қорақалпоғистон Республикаси Вазирлар Кенгаши, вилоятлар, Тошкент шаҳри, туманлар ва шаҳарлар ҳокимликлари бир ҳафта муддатда ҳисоб-китобларни қайта кўриб чиқиб, жорий йилда худудларда хизматлар кўрсатиш лойиҳалари ҳажмини қайси йўналишлар ҳисобидан камида 2 бараварга ошириш юзасидан режаларини ишлаб чиқсин.

Бош вазир ўринбосарлари **Ж.Қўчқоров, С.Умурзоқов** ўзига бириктирилган худудларда маҳаллий ҳокимликлар томонидан ишлаб чиқилган режаларини муҳокама қилиб, уларнинг ижроси устидан **ҳафталик** назорат ўрнатсин.

Тошкент вилояти ҳокимлиги (**Хидоят**), Чирчиқ шаҳар ҳокими (**Юсупов**) **икки ой муддатда** “маҳаллабай” ишни ташкил этган ҳолда, Чирчиқ шаҳрида хизматлар кўрсатиш соҳасини асосий “драйвер”га айлантириш, уларнинг ҳажмини 2-3 бараварга ошириш ҳамда замонавий хизмат турларини жорий этиш бўйича “Чирчиқ шаҳри намунаси”ни яратсин.

Миллий банк (**Мирсоатов**) ташаббускорларга бизнес лойиҳаларини ишлаб чиқишга кўмаклашиб, уларни ўз вақтида молиялаштириш чораларини кўрсин.

Миллий банк (**Мирсоатов**) **бир ой муддатда:**

ҳар бир худуднинг ўзига хос хусусиятлари, салоҳияти ва мавжуд имкониятларидан келиб чиқиб, хизматлар соҳасини ривожлантириш, жойларда янги хизмат турларини йўлга қўйиш, илғор тажриба асосида намунавий лойиҳаларни жорий этиш бўйича методологияни ишлаб чиқсин;

Миллий банк қошида хизматлар кўрсатиш соҳасини ривожлантириш бўйича Лойиҳа-таҳлил маркази фаолиятини ташкил этиб, худудлардаги банк филиалларида марказнинг бўлимларини очишни таъминласин;

мутасадди вазирликлар ва идоралар, Қорақалпоғистон Республикаси Вазирлар Кенгаши, вилоятлар, Тошкент шаҳри, туманлар ва шаҳарлар ҳокимликлари билан бирга, тасдиқланган методология асосида Лойиҳа-таҳлил маркази орқали лойиҳа ташаббускорларига тайёр намунавий бизнес лойиҳаларини тақдим этиш, уларни касбга ўқитишдан бошлаб, ўз бизнесини йўлга қўйишгача бўлган “комплекс хизматлар” кўрсатишни ташкил этсин;

Бандлик ва меҳнат муносабатлари вазирлиги (**Хусанов**) билан бирга ҳудудлардаги коллежлар базасида хизматлар соҳасидаги лойиҳаларни амалга ошириш учун зарур бўладиган мутахассисликлар бўйича аҳолини касбга ўқитиш тизимини йўлга қўйсин.

Бош вазир **А.Арипов**, Тошкент шаҳар ҳокимлиги (**Артикходжаев**):

уч кун муддатда алоҳида мажлис ўтказган ҳолда, пойтахт туманлари ҳокимлари ва сектор раҳбарларининг аниқ вазифалари, уларнинг масъулиятини белгилаб, хизматлар соҳасида камида 50 мингта янги доимий иш ўринлари яратиш режасини “туманбай” ва “маҳаллабай” тасдиқласин;

икки ҳафта муддатда Тошкент шаҳрида хизматлар ҳажмини камида 3 бараварга оширишни назарда тутган ҳолда, шаҳарнинг 524 та маҳалласи кесимида хизматларни ривожлантириш дастурини қабул қилсин.

Бош вазир ўринбосарлари **С.Умурзоқов, Ж.Қўчқоров**, Тикланиш ва тараққиёт жамғармаси (**Вафаев**) тижорат банкларига хизматлар соҳасидаги лойиҳаларга кредит ажратиш мақсадида **жорий йил 1 июлга қадар 150 млн доллар, йил якунига қадар яна 150 млн доллар** ресурс ажратилишини таъминласин.

Қорақалпоғистон Республикаси Вазирлар Кенгаши Раиси, вилоятлар, Тошкент шаҳри, туманлар ва шаҳарлар ҳокимлари:

тижорат банклари билан бирга хизматлар соҳасидаги лойиҳаларни молиялаштиришда ажратиладиган кредит суммасига тенг миқдорда лойиҳа ташаббускорларининг ўз маблағларини жалб этишни таъминласин;

бир ой муддатда сектор раҳбарлари ва маҳаллаларга иқтисодий комплексдан бириктирилган масъуллар билан бирга “маҳалла – туман – банк” тамойили асосида лойиҳалар рўйхатини шакллантирсин.

Бош вазир ўринбосари **Ж.Қўчқоров**, Миллий банк (**Мирсоатов**) **Қорақалпоғистон Республикаси Вазирлар Кенгаши, вилоятлар, Тошкент шаҳри, туманлар ва шаҳарлар ҳокимликлари** билан биргаликда хизматлар соҳасидаги янги лойиҳаларни жойлаштиришда ҳар бир маҳаллада бўлиши шарт бўлган камида 20 турдаги, туман ва шаҳарда камида 70 турдаги хизматларни ташкил этишга эътибор қаратсин.

Вазирлар Маҳкамаси (**Арипов**) **бир ой муддатда** маҳалла, туман ва шаҳарларда бўлиши шарт бўлган зарурий хизмат турларини йўлга қўйиш бўйича Ҳукумат қарорини қабул қилсин.

Миллий банк (**Мирсоатов**):

жорий йилда 28 та йирик ва ўрта шаҳарларда туризм, транспорт, тиббиёт, таълим объектлари, йирик савдо комплексларини ташкил этиш учун қўшимча 200 млн доллар маблағ жалб қилишни таъминласин;

бир ой муддатда Марказий банк (**Нурмуратов**), Молия вазирлиги (**Ишметов**), Иқтисодий тараққиёт ва камбағалликни қисқартириш вазирлиги (**Холхўжаев**) билан бирга тадбиркорлик субъектларига хизмат кўрсатиш корхоналарини ташкил этиш (молия ва савдо соҳаларидаги тадбиркорлик субъектлари бундан мустасно) ва жиҳозлаш учун Ўзбекистон Республикаси Президентининг 2020 йил 16 июндаги ПҚ–4752-сон қарори асосида ажратиладиган кредитларнинг энг юқори миқдорини 2 млрд сўмгача ошириш бўйича таклиф киритсин.

Бош прокуратура (**Йўлдошев**), Ҳисоб палатаси (**Турабов**), Ички ишлар вазирлиги (**Бобожонов**), Коррупцияга қарши курашиш агентлиги (**Бурханов**) хизматлар соҳасини ривожлантириш учун ажратиладиган маблағларнинг самарали ва мақсадли ишлатилиши устидан доимий ва таъсирчан назорат ўрнатсин.

Уй-жой коммунал хизмат кўрсатиш вазирлиги (**Хидоят**) **Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари** билан бирга **жорий йилда** бошқарув компанияларини ташкил этиш орқали кўп қаватли уйларга хизматлар кўрсатиш ҳажмини камида 3 бараварга ошириб, 1,5 трлн сўмга етказиш бўйича аниқ чораларни кўрсин. Бунда:

Тошкент шаҳрининг Юнусобод тумани ва ҳудудлардаги 1 тадан шаҳар мисолида кўп қаватли уйларга хизмат кўрсатиш ва ободонлаштириш ишларини ташкил этиш бўйича Туркия тажрибасини апробациядан ўтказиш;

Бандлик ва меҳнат муносабатлари вазирлиги (**Хусанов**) билан бирга бошқарув компаниялари ходимларини эксплуатация ва ободонлаштириш йўналишларидаги мутахассисликлар бўйича мономарказларда ўқитиш тизимини йўлга қўйишни назарда тутсин.

Ўзбекистон Республикаси Президенти Администрацияси (**Мавлонов**), Уй-жой коммунал хизмат кўрсатиш вазирлиги (**Хидоят**), Қурилиш вазирлиги (**Закиров**), Адлия вазирлиги (**Давлетов**) **бир ой муддатда** кўп қаватли уйларга хизмат кўрсатиш, ободонлаштириш ва коммунал соҳадаги қонунчилик базасини танқидий кўриб чиқиб, илғор хорижий тажриба ва замонавий талаблар асосида уни янгилаш бўйича таклифларни ишлаб чиқсин.

Транспорт вазирлиги (**Махкамов**) **Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари** билан бирга **икки ой муддатда** хавфсизлик талабларига тўлиқ амал қилган ҳолда, аэропорт, темир йўл ва автовокзаллар ҳудудларида савдо ва хизмат кўрсатиш объектларини ташкил этиш бўйича танловлар ўтказган ҳолда, лойиҳаларни амалга оширишни бошласин.

Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари Транспорт вазирлиги (**Махкамов**), Қурилиш вазирлиги (**Закиров**), Автомобиль йўллари қўмитаси (**Абдувалиев**) билан бирга **2021 йил 1 октябрга қадар** халқаро ва вилоятлараро магистрал йўллар ёқасида намунавий лойиҳалар асосида камида 500 тадан савдо ва хизмат кўрсатиш объектларини ташкил этган ҳолда, 50 мингта янги иш ўринларини яратишни таъминласин.

Бош вазир маслаҳатчиси **О.Умаров**, Ахборот технологиялари ва коммуникацияларини ривожлантириш вазирлиги (**Садиков**):

жорий йил якунига қадар Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари билан бирга АКТ хизматлари соҳасида хусусий сектор иштирокини янада кенгайтириш, нархларни арзонлаштириш ва сифатини ошириш ҳисобига алоқа ва Интернет хизматлари ҳажмини камида 2 бараварга (20 трлн сўм), дастурлаш хизматлари ҳажмини эса 3 бараварга (2,5 трлн сўм) оширишни таъминласин. Бунда “Рақамли Ўзбекистон – 2030” стратегияси бўйича тасдиқланган “йўл хариталари”нинг ижроси доирасида дастурий таъминот маҳсулотларига буюртмаларни жойлаштиришни назарда тутсин;

бир ой муддатда Давлат статистика қўмитаси (**Бегалов**), Миллий банк (**Мирсоатов**) билан бирга АКТ ва дастурлаш хизматларини ҳисобга олиш методологиясини халқаро талаблар асосида қайта қўриб чиқсин.

Бош вазир ўринбосари **Ш.Ғаниев**, Қишлоқ хўжалиги вазирлиги (**Ходжаев**), Сув хўжалиги вазирлиги (**Хамраев**) **икки ҳафта муддатда** энг муҳим 17 та йўналишдаги агро хизматлар кўрсатишни ҳар бир пахта ва ғалла кластери кесимида тасдиқлаб, кластерлар томонидан тегишли хизматлар кўрсатишни йўлга қўйишни ташкил этсин ва ижросини шахсан назоратга олсин.

Бош вазир ўринбосари **Ж.Қўчқоров**, Давлат солиқ қўмитаси (**Кудбиев**), Бандлик ва меҳнат муносабатлари вазирлиги (**Хусанов**):

бир ой муддатда хизматлар кўрсатишни “соядан чиқариш”, бу йўналишда тадбиркорлик субъектларининг эркин фаолият юритиши учун зарур тартибларни янада соддалаштириш бўйича қўшимча таклифларни Ўзбекистон Республикаси Президенти Администрациясига киритсин;

ҳар бир ташкил этилаётган хизмат кўрсатиш шохобчаларида яратилаётган доимий иш ўринларини мунтазам мониторинг қилиб, уларнинг ҳаққоний ҳисобини юритишни таъминласин.

Бош вазир ўринбосари **Ж.Қўчқоров**, Молия вазирлиги (**Ишметов**):

бир ҳафта муддатда вазирликлар ва идоралар масъул бўлган соҳаларда кўрсатиладиган пуллик хизматлар режасини тасдиқлаб, уларнинг ижроси тўғрисида **ҳар ойда** Ўзбекистон Республикаси Президенти Администрациясига ҳисобот киритиб борсин;

Марказий банк (**Нурмуратов**), тижорат банклари раҳбарлари билан бирга **бир ой муддатда** замонавий банк, молия, консалтинг хизматлари, жумладан, “банк эко тизими”, баҳолаш, аудит, суғуртанинг янги хизмат турларини жорий этиш бўйича алоҳида дастур қабул қилсин.

Қурилиш вазирлиги (**Закиров**) **Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари** билан бирга **бир ой муддатда** туманлар ва шаҳарлар марказларида савдо ва хизмат кўрсатишга ихтисослашадиган махсус кўчалар ва марказларнинг жойини танлаб, тегишли лойиҳаларини ишлаб чиқсин ҳамда уларни лотларга бўлган ҳолда, танлов асосида савдоларга чиқаришни таъминласин.

Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари:

Ички ишлар вазирлиги (**Бобожонов**), Миллий гвардия (**Джураев**) билан бирга савдо ва хизмат кўрсатиш объектларининг одамларга ҳалақит қилмаган ҳолда, 24 соатлик режимда ишлашига рухсат бериб, ушбу тартиб ижросини мунтазам назорат қилишни таъминласин;

Ўзбекистон мустақиллигининг 30 йиллик байрамига қадар пойтахтнинг 10 та кўчасини, шунингдек вилоят марказлари ва шаҳарлардаги 3-4 тадан аҳоли гавжум кўчани замонавий савдо ва хизматлар марказига айлантириш чораларини кўрсин.

Бош вазир ўринбосари **Ж.Қўчқоров**, Молия вазирлиги (**Ишметов**), Халқ таълими вазирлиги (**Шерматов**) **Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари** билан биргаликда **икки ҳафта** муддатда кам таъминланган оилалар фарзандларининг умумтаълим мактабларида узайтирилган гуруҳларда ўқиши учун тўловларни “темир дафтар”, “аёллар дафтари” ва “ёшлар дафтари” жамғармалари ҳисобидан қоплаб бериш тартибини жорий этсин.

Бош вазир ўринбосари **Б.Мусаев**, Мактабгача таълим вазирлиги (**Шин**) **Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари** билан бирга **бир ой** муддатда тунги сменада ишловчи аёлларнинг фарзандлари учун мактабгача таълим муассасаларида 24 соатлик гуруҳларни ташкил этиш тартибини ишлаб чиқиб, талаб юқори ҳудудларда уларнинг фаолиятини йўлга қўйиш чораларини кўрсин.

Бош вазир ўринбосари **Б.Мусаев**, Соғлиқни сақлаш вазирлиги (**Хаджибаев**) **Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари** билан бирга **икки ой** муддатда вилоят марказлари ва йирик шаҳарлардаги кўп тармоқли шифохоналар, тиббиёт олийгоҳлари ҳудуди ёки уларнинг атрофида давлат-хусусий шериклик асосида тиббиёт кластерларини ташкил этиш бўйича лойиҳаларни танлов асосида бошласин.

Фарғона вилояти ҳокимлиги (**Бозаров**), Фарғона шаҳри ҳокимлиги (**Убайдуллаев**) **икки ой** муддатда Ислом Каримов номидаги Фарғона вилоят театр-концерт саройи ҳудуди, “Марғилонсой” канали бўйидаги бўш ер майдонлари, шунингдек “Регистон” кўчаси “Истиклол” стадиони яқинидаги бўш ерлар ва ушбу кўчадаги кўп қаватли уйларнинг биринчи қаватларида намунавий лойиҳалар асосида хизмат кўрсатиш объектларини жойлаштириш орқали мазкур ҳудудларни 24 соат ишлайдиган замонавий савдо ва хизмат кўрсатиш марказларига айлантириб, “Фарғона шаҳри тажрибаси”ни яратсин.

Бош вазир ўринбосари **Б.Мусаев**, Олий ва ўрта махсус таълим вазирлиги (**Тошқулов**) **Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари, олий таълим муассасалари ректорлари** билан бирга **икки ой** муддатда ҳар бир олий таълим муассасаси ҳудудида хорижий тиллар ва касбга ўргатиш, тайёрлов курсларини ташкил этиш бўйича хусусий сектор иштирокида камида 10 тадан янги лойиҳаларни ишлаб чиқиш ва бошлаш чораларини кўрсин.

Бош вазир ўринбосари **Б.Мусаев**, Давлат активларини бошқариш агентлиги (**Ортиқов**), Халқ таълими вазирлиги (**Шерматов**), Олий ва ўрта махсус таълим вазирлиги (**Тошқулов**) **бир ой муддатда** умумтаълим мактаблари ва олий таълим муассасалари ҳудудида жойлашган ошхоналарни тадбиркорлик субъектларига ижарага беришда ижара ҳақи тўлови бўйича имтиёзлар тақдим этиш юзасидан асосланган таклифларни ишлаб чиқсин.

Халқ таълими вазирлиги (**Шерматов**) **Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари** билан бирга **бир ҳафта муддатда** “Жиззах тажрибаси” асосида тадбиркорлик субъектларини жалб қилиш орқали умумтаълим мактаблари ҳудудидан самарали фойдаланган ҳолда, давлат ва хусусий мактабларни қўшма жойлаштириш бўйича таклифларни Ўзбекистон Республикаси Президенти Администрациясига киритсин.

Бош вазир ўринбосари **Ж.Қўчқоров**, Миллий банк (**Мирсоатов**), Давлат статистика қўмитаси (**Бегалов**), Савдо-саноат палатаси (**Икрамов**) **бир ой муддатда**:

хизмат кўрсатувчи объектлар сони, хизматлар ҳажми, яратилган иш ўринлари ва янги хизмат турлари, солиқ тушумлари каби кўрсаткичлар асосида маҳалла, сектор ва туманларнинг чораклик рейтингини аниқлаш методологиясини ишлаб чиқиб, **2021 йил 1 июлдан** бошлаб амалиётга жорий этилишини таъминласин;

ушбу методология асосида жойлардаги секторлар ва тижорат банклари раҳбарлари, шунингдек соҳага масъул вазирликлар ва идоралар раҳбарлари фаолиятига баҳо беришнинг аниқ мезонларини тасдиқласин;

янги методология ва баҳолаш мезонлари асосида иқтисодий комплекс таркибига кирувчи ташкилотлар ва тижорат банклари ходимларини ўқитишни ташкил қилсин.

Бош вазир ўринбосарлари **Ж.Қўчқоров**, **С.Умурзоқов** ҳокимларнинг молия-иқтисодиёт ва камбағалликни қисқартириш масалалари бўйича биринчи ўринбосарлари, тижорат банклари, молия, солиқ ва бошқа иқтисодий комплекс идоралари билан бирга ҳудудларда хизматлар соҳасини ривожлантиришда юзага келадиган барча муаммоларни тезкор равишда ҳал этиб борсин.

Бош вазир ўринбосари **А.Абдуҳакимов**, Бухоро вилояти ҳокимлиги (**Зарипов**) **бир ой муддатда** Бухоро вилояти ҳудудида жойлашган маданий мерос объектларини таъмирлаш бўйича алоҳида дастур ишлаб чиқсин, бунда таъмирлаш ишларига жалб қилинадиган усталарни тайёрлаш ва малакасини оширишга алоҳида эътибор қаратсин.

Қорақалпоғистон Республикаси Жўқорғи Кенгеси (**Камалов**) ва Вазирлар Кенгаши (**Сариев**) **бир ой муддатда**:

И.В.Савицкий номидаги Қорақалпоғистон давлат санъат музейи ҳудудида замонавий савдо ва хизмат кўрсатиш объектларидан иборат сайилгоҳ ташкил этиш, Дўстлик” канали бўйида кўнгилочар масканлар, савдо ва хизмат кўрсатиш объектларини жойлаштириш, шунингдек археология музейини ташкил этиш бўйича лойиҳа таклифларини ишлаб чиқсин;

ҳар бир туман ва шаҳарда хизматлар соҳасини ривожлантириш бўйича “маҳаллабай” дастурларни тасдиқлаб, уларнинг ижроси бўйича **ҳар ойда** ҳокимларнинг ҳисоботларини эшитиб борсин.

Бош вазир ўринбосарлари **Ж.Қўчқоров, С.Умурзоқов** ва Ҳисоб палатаси (**Турабов**) ушбу баён топшириқларининг белгиланган муддатларда ва сифатли амалга оширилиши юзасидан қатъий назорат ўрнатиб, **ҳар ой якуни бўйича** Ўзбекистон Республикаси Администрациясига батафсил ҳисобот бериб борсин.

Ўзбекистон Республикаси
Бош вазири

Ўзбекистон Республикаси
Президенти Администрацияси
раҳбари

А. Арипов

З. Низомиддинов

2021 йил “_____” апрель

2021 йил “_____” апрель